

NIZAKO HITZARMENAREN SINATZEA. Europako Batasuna zabaltzeko modua egin eta erakundearen erreforma aurrera ateratzeko helburuarekin pasa den urteko abenduaren 11n Nizan lortutako akordioa sinatu zuten atzo EBko Atzerri ministroek.

Hamabostek konpromisoa hartu dute 2004an erreforma handiagoa egiteko

Europako Batasuneko estatu kideetako legebiltzarrek berretsi beharko dute orain Nizako akordioa



GEORGES GOBET / EPA

Europako Batasuneko goi agintariak, atzo, Nizako Hitzarmena sinatu ondoren.

NIZAKO HITZARMENAREN PUNTU NAGUSIAK

EUROPAKO BATZORDEAREN OSAKETA. Europako Batasunaren organo betearazlea da Europako Batzardea eta egun 20 kidek osatzen dute. Batzardeko presidentek, Alemaniak, Frantziak, Erresuma Batuk, Italiak eta Espainiak bi komisario dituzte, eta beste hamar kideek bana. Estatu *handiek* 2005ean komisario bat galtzea onartu zuten Nizan. Estatu *txikiek*, ordea, uko egin zioten beren ordezkaria galtzeari. Hala, soilik EBn 27 kide daudenean aztertuko da komisario kopuruaren gaia, baina Batzardeak gehienez 27 komisario izatea adostu zuten Nizan.

BOTO KOPURUA BERRIRO AZTERTZEA. Europako Ministroen Kontseiluko gehiengo kualifikatuaren erabilpena aztertu zuten Hamabostek Nizan. Egundako estatu *handiek* (Alemania, Frantzia, Erresuma Batua eta Italia) hamarna boto dituzte, eta *txikiak* (Luxenburgo) bina. Nizan adostu zen 29 eta hiru botoren arteko banaketa egitea estatuen artean. Estatu *handien* boto kopurua mantendu egin zen. Alemaniak, gainera, biztanleriaren konpentsazioa lortu zuen Nizan, eta, hala, aukera izango du Ministroen Kontseiluan proposamenak onartzerakoan

baldintzat jartzea alde dauden kideek EBko biztanle gehienak, % 62, ordezkatzeko (gehiengo bikoitza).

GEHIENGO KUALIFIKATUA. Kontseiluan aho batez onartu beharreko gaiak gutxitu ziren Nizan. Hala, gehiengo kualifikatua nahikoa izango da orain beste 50 arloren inguruan erabakiak hartzeko. Estatu gehienek, baina, beto eskubide osoa edo partziala izaten jarraituko dute horientzat garrantzitsuenak diren gaietan.

ELKARLANA INDARTZEA. Sistema horren bitartez, herrialde kopuru mugatu batek zenbait arlotan besteak baino azkarrago aurrera egiteko aukera izango du. Hitzarmena indarrean jartzen denean, zortzi estatu nahikoak izango dira elkarlan estuagoa aurrera eramateko, eta inork ez du beto eskubiderik izango hori blokeatzeko.

EUROPAKO PARLAMENTUA. Ekialdeko estatuen sarrerarekin, eserlekuen muga 626tik 732ra igotzea adostu zen Nizan. Alemaniak legebiltzarkide kopuru berari eutsiko dio, eta Belgikak bi gehiago izango ditu. Beste kide guztiek eserlekuak galduko dituzte.

Erredakzio | DONOSTIA

EB Europako Batasuneko Atzerri ministroek bilera egin zuten atzo Nizan, pasa den urteko abenduaren 11n hiri horretan bertan hitzartu zuten akordioa sinatzeko. Nizako Hitzarmenak EBko erakundeak eta erabakiak hartzeko prozedurak erreformatu behar zituen, Batasuna estatu berrien sarrerarako prest egon zedin. Baina estatu *handien* eta *txikiak* arteko hika mikaren ondorioz, Nizan lortutako akordioak EBren funtzionamendua korapilatu zuen eta erabaki garrantzitsuenak atzeratzea adostu zen.

Hori horrela izanda, EBren hurrengo hitzordu handia 2004ko Gobernuen arteko Konferentzia izango da. Izan ere, EBko Atzerri ministroek atzo berretsi zuten, biler horretan egingo da Batasunaren «erreforma handia», eta askok espero dute bilkura horrek Nizan egindako akatsak konpontzeko balio izatea. Hala ere, Jacques Chirac Frantziako presidentek Hitzarmenak jasotako kritikei aurre egin zien atzo, eta akordioa ahalik eta azkarren berresteko deia egin zuen.

Hitzarmena berretsi

Atzoko ekintza sinbolikoaren ostean, Nizako Hitzarmena berresteko prozesua hasiko da orain. Izan ere, EBko estatu bakoitzeko Legebiltzarrek eta Europako Parlamentuak formalki berretsi beharko dute Hamabostek atzo sinatutako akordioa. Prozesu hori, ordea, zailtasunez bete egongo da, hitzarmenak jaso dituen kritiken eta testuaren argitasun faltaren ondorioz.

EBren azken helburuaren inguruan eztabaida «berritzailea» egin eta aro berriari «handinahiez» aurre egiteko dei egin zuen atzo Nizako Hitzarmena gogor kritikatu duen Romano Prodi Europako Batzardeko presidentek. Nicole Fontaine Europako Legebiltzarreko presidentek ere aro berriaren garrantzia nabarmendu zuen.

Potere banaketa berria

Kideak	BOTOAK EUROPAKO BATZORDEAN		POPULAZIOA	
	Gaur egungak	Geroan	milioitan	%
Alemania	10	29	82,0	17,05
Err. Batua	10	29	59,2	12,31
Frantzia	10	29	58,9	12,25
Italia	10	29	57,6	11,97
Espainia	8	27	39,3	8,18
Polonia	27	38,6	8,03	
Errumania	14	22,4	4,67	
Holanda	5	13	15,7	3,27
Grezia	5	12	10,5	2,18
Txekia Errep.	12	10,3	2,13	
Belgika	5	12	10,2	2,12
Hungaria	12	10,0	2,09	
Portugal	5	12	9,9	2,07
Suedia	4	10	8,8	1,83
Bulgaria	10	8,2	1,71	
Austria	4	10	8,0	1,67
Eslovakia	7	5,3	1,12	
Danimarka	3	7	5,3	1,10
Finlandia	3	7	5,1	1,07
Irlanda	3	7	3,7	0,77
Lituania	7	3,7	0,76	
Letonia	4	2,4	0,50	
Eslovenia	4	1,9	0,41	
Estonia	4	1,4	0,30	
Txipre	4	0,7	0,15	
Luxenburgo	2	4	0,4	0,08
Malta	3	0,3	0,07	

A. PEÑALBA